

四庫全書

集部

欽定四庫全書

集部

愚谷集卷

一至三

詳校官給事中臣王鍾健

中書<sub>臣</sub>劉源溥覆勘

總校官進士臣繆琪

校對官中書臣王璜

謄錄監生臣王天祿

欽定四庫全書

集部六

愚谷集

別集類五

明

提要

臣等謹案愚谷集十卷明李舜臣撰舜臣字

茂欽號愚谷又號未村居士樂安人嘉靖癸

未進士官至太僕寺卿是集詩四卷曰部署

稿曰金陵稿曰江西稿曰歸田稿文六卷前

有康熙丙午周亮工序蓋亮工官山東時所

刊也詩格雅飭而頗窘於邊幅所長所短皆在於斯文古質而稍覺有意謹嚴或剝削太過故亮工序記王世貞語有體製纖小之譏然於時北地信陽之學盛行於世方以鉤棘塗飾相高而舜臣獨以朴直存古法其序記多名論而西橋逸事狀一篇觸張璠桂萼之鋒直書不諱文出之日天下咋舌抑亦剛正之士矣據集所載小序舜臣所著有易卦辱

言詩序考毛詩出比禮經讀春秋左傳考例  
穀梁三例左傳讀古文考三經考籀文考六  
經直音諸書今皆未見然亦足見其文之根  
柢也乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--

欽定四庫全書

愚谷集卷一

明 李舜臣 撰

詩

自叙曰沁水常明卿先生何如人哉而蒙謗罷官歸卒又數年始稱其詩所謂常評事集刊在南康郡署讀其詩何忝我明之世乎而徒遺後人嗟雖然愈于與骨并朽者焉嚴氏之言曰詩有別材非

闕書也今始知之而往十八年間余頗有詩二百  
首餘語有之彼屋之隆寧僕我躬余之不能付余  
詩火亦有以矣未村居士李舜臣題

部署稿

春夕

日夕散車騎攬轡每委遲署松紛翠靄宮柳何苑斯入  
門纖月上宿鳥滿庭枝微風振遺凜暮色正淒其客心  
易為感萬念咸在茲豈無芳草色祇足攬歸思



春日懷歸

陶令賦歸辭漆叟稱達生  
揆余企高躋頗亦悅幽情  
永惟故山日桃李此時榮  
萋萋原上草粲粲園中英  
翠莖浮澗藻丹葩艷山櫻  
疏池納文鯉伐木候春鶯  
陽澤今豈異撫物阻神京  
昔人歎非土能不念吾耕

早春憶故園

往茲薦禫日朱明甫南移  
青青原麥秀嫋嫋陌桑枝  
家世本農業曾讀耕田詩  
豐臯餉童僕薄往閱耘耔  
剪茨

開舊園命板成曩基脩楊鬱近岸翠栢榮前墀木實紛  
丹碧蔬挺何歲蕤晨雞夕自入夏蟬秋始悲別來歲云  
暮又見春草滋興言念故宇感激能無思

有懷故園親族

昔子遘天禍負葬歸東州寒暑倏流易三載捷更籌微  
息幸猶續壯志嗟已休譬之凝霜草衰枯在九秋又似  
不材木托根于林丘遭逢聖人朝岩穴拔淹留遂忘不  
肖軀感激昨來遊故園日已遠荒壠誰為耨親族忽若

遺有懷安所投茲身雖千里夢寐常相求  
王程限南北歸路何悠悠不能似高鳥去來雲中由俯仰覺心傷淚下如泉流

復除戶部

吾往被沉疴乞歸向桑梓蹉跎狗馬軀殘生得無死迂  
愚偶自忘將身仍上北去國二載餘王正忻至止威儀  
覩漢官百爾瞻君子不有賢豪人豈復知吾鄙當塗辟  
持衡低昂定嘗擬顧惟朽鈍姿徙官亦有以猶懼不克

任中心寧自理不見昔時賢  
遭逢尚如彼賈傅哭長沙  
中郎錮邊里釋過且兼茲  
叨蒙詎有涖猶竊紫宸班亦  
友青雲士省署復多暇  
得不廢書史竊比鷦鷯枝  
取適惟容趾敢希大隱名  
晦跡云朝市

贈別高子業

今上始龍飛中興如日旭  
文物何休明忠賢盡來復  
殊方獻白環嘉氣瞻黃屋  
生逢泰階平偶竊南宮錄  
君時獨少年為衆所屬目  
翰墨已縱橫威儀亦肅穆  
手自握

蘭蓀猶似欽余馥因彈貢公冠果枉山濤牘九萬擬層  
霄隨君忽遐翻晨趨建章班夕散司衡局明時重交游  
暇日相徵逐歡言詎足珍意氣乃多淑上欲窺鴻濛直  
遡羲皇樸其次稱詩書頗慚馬遷獨作賦準班揚舒詞  
邁阮陸遙遙十載心悠悠久未副分手自曩茲開顏亦  
昨倏微志不及申薄遊遂再辱何知此為別去住俱迫  
促惟有慰相離榮名能自勗

聞言簡高子業

白日麗層空，鶴雛逝有適。饑鳶啄其下，區區虞見迫。腐鼠豈其珍，徒爾聲相嚇。人生有定姿，寧與浮名易。亦有灌園人，三公棄如擲。寸心苟不察，殷憂復何益。

雨夜

八月風露清，雨落猶如注。泱旬今不休，無乃神龍怒。袞袞早已寒，蹉跎未能去。棄置自千秋，人生貴有素。紛紛輕薄兒，莫以賢豪故。

直省憶藍玉甫時渠在係

省宿良幽曠撫已忽多闕為問夜何其長河還未沒孤  
愁當此時惆悵難可歇事變信何常棄捐成倏忽幽拘  
復在茲念子每驚骨子今無羽翼歸歟當曷月

有感

泝或難免機樨不可為豈不貴所用工拙有相宜當  
津遊上才皎皎揚英姿伊予山野人微尚殊支離下翔  
限斥鷃歸捧慚西施不如脩初服從此遄還期

太宰喬公送行詩時吐魯番入寇

夢寐錫宸衷台衡屬上公蒼生安石在袞職仲山工萬壑深滄海繁星爛碧空兵戈今老去遯矣哲人風

送丁德卿出守撫州

康樂臨川日江山屬壯遊羨君今出守於此復鳴騶地以紅泉勝亭餘碧澗幽遙知詞賦手千載揖風流

夜歸

憐此歸來晚蕭蕭夜色深月明孤鳥宿秋急亂蟲吟名薄勞萋斐心踈滯紱簪因思郎署裏賢俊昔如林



驗封署芍藥獨不開花

羣芳時欲歇，惜此獨荒涼。  
自昔名元美，當春意故藏。  
無人知艷色，何事吝清香。  
翻被東園樹，因風笑爾狂。

晚歸

匹馬衝煙落，荒堦漸月移。  
正多桑梓意，無奈蕙蘭衰。  
浮滯秋將杪，長愁鬢欲絲。  
依牆惟數菊，過此亦難支。

不寐

夜氣涼如水，羈心耿似星。  
風鳴應落樹，月上欲侵櫺。  
去

住身皆拙遲回計不停明朝從季主試向卦中聽

酒醒

何限推心事常因醉裏輕扳歡隨近舍縱飲托同聲尚  
憶憑人入應多宿鳥驚沉昏知可戒穩卧偶吾情

再調考功

已作還鄉計秋風却病軀清時登片善華列及吾迂豈  
有温如玉翻疑暗似珠由來山鳥性不願九韶娛

秋夕庭中悵然有懷吳文濟御史時渠將有閩中

之行

金氣當軒肅蒼煙使舍幽下堦聊獨往倚樹忽千憂名  
逐羣芳晚心摧落日秋所親仍別去炎德指南州

送吳文濟入閩

行色將南指君恩向闕辭拂霜蓬且轉明日酒難持去  
國能無惜分襟復在茲直須春草遍始是解裝時

嘗酒

豈是葡萄釀祇憑玉露斯愁多須此仗祿薄本相宜束

帶陶將去登樓聚有思何言頑與聖更盡手中卮

寄任元朴

去國今二載猶傳諫諍名聖朝非爾棄時俗乍相傾跡  
向陶丘斂書從梁獄明平生欲何似歲暮卧山城

秋夕吳文濟御史見訪

出省惟公暇深居每獨思故人驄馬客薄暮菊花卮月  
正清秋滿霜裁變露為非君茲枉駕何限使吾悲

寄劉叔正蜀中

劍閣青山外都門紫氣邊相看俱萬里分手已三年去  
國是何日浮槎想近天念從衆君子交結昔何妍

問答

吾有滄州興兼聞貝錦詩秋風輕棹發暮月省郎辭夜  
織看星轉春耕候雨施何如羣智裡憂苦意長疲  
憶在東山日看君智似高頃緣趨召至應為念歸勞稼  
穡聞嘗學桑麻手所操由來玄豹質多在霧中韜

寄報家兄吾有歸志

此處故人稀緇塵况滿衣祇緣五斗重滋覺寸心非  
海上鷗堪狎天邊雁欲飛終當親稼穡白首共山扉

聞言

豈是蛾眉者時聞謠詠諠從來多不免如我復何言  
冠蓋慚新識漁樵悔故村東南如假翼歸路一朝翻

郊壇候駕

金扉啟禁垣火樹照平原警蹕鳴空下旌旗夾路翻  
一龍蹕日馭百獸舞雲門歲歲甘泉上瞻迎萬乘尊

贈黃時庸

海岱惟吾土生才每不羣承明今謁帝意氣始知君叔  
度陂千頃簫韶奏九閩仍看作者志直欲繼斯文

闕下初心醉堂中共目成映尊梅未盡承步草新生白  
雪聽歌郢甘泉見賦京吾承騷雅後何限慰交情

城隅別某

匹馬送將違心搖正欲飛好依官道柳且傍老萊衣草  
藉清尊滿花餘故樹稀平生君共我獨自夕陽歸

春日姚氏園候客

嘗從賓席末聞道郭園名之子舟將泛茲吾益少傾花  
明嬌日色鳥作弄春聲便可留今夕應多滿月情

春日飲蘭亭章石室時與黃李二子同坐

共到蘭亭飲仍因石室留如何城市裏亦有洞巖幽泛  
鼎疑煙宿當窓似澗秋俄聞鶯響發無乃谷中求

入朝逢李子西御史聯步

鳥動秋河徹雞鳴夜漏空樓煙霜更紫海色曙全紅星



落千官騎天開萬戶宮此時趨禁闕正與故人同

曉起

微步出前墀東方欲曙時殘花猶帶露宿鳥忽驚枝飲  
酒身多病看梳髮有絲未應迂謬迹還寄省郎為

直省

向夕風煙迴空庭鳥雀餘塵襟還役物暝色正愁余髮  
有星星改名將日日疎因思郎署裏未若托吾廬

寄黃時庸浙中

昭代今詞客東江復此行山聞霞似色湖憶鏡為名巖  
瀨千巖迴枚濤八月驚天台仍勝絕隨意暢高情

得某汝寧書

南國棠為舍斯人玉作書知君思遠道猶我怨離居去  
住身皆客山河歲漸除念從花下別早已樹頭疎

待趙景仁不至

曾許過隣舍朝朝望至曛人應天路杳鳥復夕庭紛月  
迴光初滿霜清氣畧聞羈心愁對此何況正思君

送李子西出按宣大

拂曉動危旌，嚴垂指北平。  
烽烟還未靖，驄馬故遄征。  
二鎮雄天邑，千山亘石城。  
直勞前箸借，已奪右賢精。

萬里長城險，三秋太白明。  
雁關天上啟，狐嶺雪中行。  
斧鉞垂寒色，鉦聲壯朔聲。  
要令沙漠外，遙憚漢賢名。

清邊知有志，慷慨赴戎行。  
沙磧行荒塞，風雲控朔方。  
角弓彎漢月，鐵騎獵邊霜。  
萬里狼烽靖，歸來凱奏長。

塞草鬱何豐，邊塵望不窮。  
龍沙連海上，鳥道入雲中。  
懸

斧三軍肅揚旌六郡雄佇聞飛檄至他日暮南空

塞上

秋風邊塞上飛檄忽縱橫獨將三軍出分為四道行陰  
山鋒始接瀚海帳皆傾縛得名王至聲驅右北平

送許亨甫以其父大司徒公命省其祖母

愛子窺顏色趨庭問所思望中雲共遠階下草方滋曉  
日明金騎春風吹綠枝還聞臨別去遙附萬年卮

送崔懋言赴順慶太守

雪落朔風淒寒光逼馬嘶征途天共遠到日草方萋春色行花縣煙波下篆溪無為歎非土遙逐夜猿啼

省中曉起偶有所思

在公常夙夜出戶偶徘徊忽忽嚴更徹紛紛曙色開禁鐘清曉月宿露滴庭槐鳥有鳴相和人皆去不迴

緩步庭中

倏忽悵無娛空庭步自虞本無黃綬意偶忝赤墀趨草色萋閑徑鶯聲滿上都何當乘此去散髮故山隅

偶從諸公走馬通惠河邊

南陌苦多塵相從出水濱微風搖浦樹晴日暖洲蘋彼  
鳥猶求友羣鷗似狎人悠然磐石上一叟正垂綸

通惠河

碧水澹晴空桃花夾岸紅溪流垆畔合城闕渡頭雄浩  
蕩來何極蒼茫逝不窮應從御溝去長遶鳳皇宮

闕左候朝

清光想玉旒曙色望瀛洲鵬海蒸霞出龍池入月游南

熏榮綠樹北斗掛丹樓  
顧忝金門籍朝朝此薄留

雨晴

宿雨霽丹暉高天出翠微  
花如新濯錦草似偶含璣  
殘霧憑樓宿輕霞度闕飛  
鶯歌應滿樹蘭氣漸通扉

同趙景仁遊邵氏郊園

出郭共追尋因君諧夙心  
忽如金作谷兀爾石成岑  
徑轉青蘿曲溪流綠樹陰  
亭臺紛可悅今日始窺臨

秋日贈友

乞疾頃來思秋風忽若斯黃花開獨晚玄鳥去何之稍  
習田家苦方知靜者為多君能枉駕時復慰吾私

西屏詩二首為館人葉直夫賦直夫卜居宣武坊

北門對西山以西屏自號也

結宇雖城市為屏乃翠微隔離紛可望疊嶂遠相依雨  
後煙霞出天邊雁鶩飛一尊時對酌瀟灑似君稀

勝絕城西路昨來始一過山空泉自響湖迴芰應多望  
極憑雲閣尋幽到石窩早知為地主好與共鳴珂



秋夕王潼谷度支見訪

驚鵲棲難穩，飄蓬任所如。  
昨來猶逆旅，忽報有高車。  
庭次堪留客，城隅為索居。  
時聞話潼谷，吾志亦歸歟。

寂寞揚雄宅，惟君數見過。  
家貧全簡率，名薄共蹉跎。  
暝色明河出，秋風落木多。  
一尊新市得，清濁試如何。

一榻迎暉下，歸軒肯夜闌。  
多君心尚爾，為客鬢俱斑。  
露氣添新酒，花香入薄餐。  
娟娟天上月，聊得共長安。

雨

薄午炎蒸極忻看雨足垂似添池草綠應灑陌塵緇吏  
道聊乘暇幽襟復在茲因思故里日耕稼候東菑

午日約趙景仁出郭景仁有辭因簡

午日蒙恩澤彤庭既醉歸此時仍逸興相與及餘暉林  
壑聞多美朋曹覺近稀如何草玄思不暇覽芳畿

馬上偶然作

秋風鼓大荒萬里長空來忽然被羣木瑟瑟鳴聲哀黃  
葉日夜落蕙草庭中摧鴻雁號雲中蓬轉何時回顧惟

仕京邑二載茲徘徊時哉豈所適拙薄成嫌猜常恐夙  
昔意零落隨浮埃不潔一以蒙西子猶堪哀胡為復南  
陌追逐相喧飀

壽詩

一鳥翔天中毛羽何奇哉謂從萬里崑崙道遙指三山  
碧海隈須臾靈駕何繽紛鳳管鸞簫翕可聞正逢結實  
千年日共馭為章五色雲五色雲中振羽裳千年樹畔  
赴霞觴玉闕金臺相照耀天文海色共青蒼其中燕喜

何冲融其上龍光正鬱葱曾勞八駿陪瑤水偶值羣仙  
朝碧空霓旌翠蓋駐天門紫閣瓊宮絕世喧靈妃前獻  
南星壽玉女旁開北斗尊已經人世幾春秋鶴舞龍吟  
尚未休青青桂樹金波濕灼灼扶桑紫氣流忽而來兮  
倏而歸還于海上拂雲衣朝從東極乘初日夕息西山  
憩落暉遨遊八極信悠哉下見江河萬古來還將此日  
蟠桃宴永作夫君壽祝杯

夜飲馬考功宅

服采少暇日良夜暢由衷肅肅颺迤北亭亭月在東中  
天爛河宿清暉麗房攏夙心期勝引晤語忽宵中昔高  
蕃榻下今攝膺門崇徒倒中郎屐深愧伯牙桐歸來諒  
得遣慰我憂冲冲

報國寺餞薛君采緣陪諸僚登毘盧閣二十四韻

寶閣凌閭闔煌煌鎮帝京梵宮茲棟宇塵世俯簷楹飲  
餞叨羣哲追隨緣一行良辰屬景豁極眺有山晴王粲  
銷憂興玄暉撫化情如聞鈞樂發想見玉毫呈晤語應

朝徹相看或籟鳴  
傍徨翻不愜悽惻  
故多嬰吐魯今深  
寇河湟正用兵  
御裘心耿耿班馬  
泣嗶嗶况復橫戈  
卒還餘細柳營  
皇靈須震疊百二  
此藩屏謀廟思裴  
令喻薪憶賈生時  
猶工貝錦星獨耀  
欖槍雞犬寰中困  
貂璫座上盈  
羨懷常似喪渴病  
分無成念拙機甘  
息包荒德莫名  
濕灰悲列子肯  
祭感庖丁賤子  
公車辱同人意氣  
宏忘年期好我  
奮藻愧登瀛頓覺  
遊蒙盡彌憐灑氣  
清繁霜疎古木  
殘律振寒城賞  
倦談禪夕魂勞  
去客旌淒

涼燕燕賦朗詠骨為驚

愚谷集卷一



欽定四庫全書

愚谷集卷二

明 李舜臣 撰

金陵稿

金陵遇馮子和舊同吏部

山城初上日鞍馬落前墀宛似清朝罷叨陪宰府時浮  
雲如世事流水只君思五嶽惟當去看余鬢欲絲

宴集東麓亭因過西山道院

幽房去何處只隔杏花叢碧水如明鏡青山掛彩虹庭  
滋芳草遍城枕大江雄雖復隣朝市東南在目中

送湛甘泉尚書赴京

海內稱耆舊公名滿縉紳遭時佐明主幾歲托邦人鎮  
俗山河壯移官省閣新平生經濟在詣闕待親陳

送潘鵝峯侍郎改官兵部

清朝司馬貴選授必人英已佐金陵久還徵采鷓行殊  
方知姓字前席待光榮公到多籌畫邊塵豈復驚

不寐

冬來不適意况復雁南飛枕上空山葉窓中明月暉一  
秋多在病千里正思歸不耐江南住今年又授衣

送劉叔正出守永平

南國接芬芳忻聞薦省郎君行名已晚此別路何長馬  
首指滄海漁陽即故疆異時儒術理為郡有輝光

庭樹

為愛窓前樹花時一院翻清霜能肅殺黃葉早紛飛近

壁蛛絲滿空庭鳥宿稀悽然此時意不獨弔殘暉

同劉叔正王道思李邦良登報恩寺浮圖

隱隱荆門水紛紛海上山身猶依禁闕目已極河關  
蒼日千巖散窻雲五色還同來霄漢裏獨喜淨塵顏

送同年張助教赴刑部主事

同榜十年餘君才世所須遭逢多不賤辛苦獨為儒  
畫舫乘春去金門待漏趨分曹荷明主從此借雲衢

送王念覺出守衛輝王舊給事

曩君報主志慷慨即南車到處為良吏  
明廷有諫書潮平江路濶沙淨日光虛  
早逐春風去中州領郡初

贈徐章甫大理

明時廷尉選佳勝復留都湖水清  
官舍山城入畫圖平反三歲在幽賞  
四時俱不見歌為政人今滿路衢

李端甫招至徐氏東園鄉人同坐  
端甫時有杭州之行

繁華南國裏流水古城邊  
剖竹人將去投林鳥競翻  
潭

光澄日夕柳色變春先笑指清尊在要當醉別筵

徐錦衣西園陪宴朱子禮太僕

尚憶觀魚戲重來送馬蹄故人江漢客賢主薜蘿樓  
煖日榮芳樹晴煙小碧溪春風二三月定有好禽啼

送內兄伯雨出守松江

海上分符日城隅立馬時昨來何自意早到使人悲  
雨雪征途滿春風到郡吹惟應大江去浩蕩寄相思

餞別內兄伯雨

明經有未遇四十已專城豈不榮名羨終多悵別情山  
橋冰欲合官舍雨常鳴賴有前庭竹能如舅氏清

內兄見招夜坐言別

到門忽自識客舍早梅開凜歲偶相似清芬又不摧江  
風飄月上河漢倒煙來長孺亦為郡當時許召回

內兄見招軍器局鄉人同坐

爾郡得斯人終知戀所親推牛徵我輩過鳥怪簪紳華  
館涼陰結丹樓霽雪新勿言獨別去誰料客中身

內兄見招東園諸公同坐

一徑入幽園門牆繞樹繁大夫為地主公子避人諠  
水竹無塵到寒花有雪存輝輝長者後吾忝亦飛軒

徐錦衣西園陪餞內兄

素雪舒梅遍蒼煙帶竹深林扉開淨色庭木落疎陰五  
馬故人去三杯遊子吟池亭多可到歸路恐難尋  
鑿石新成徑臨流舊結軒城邊飛蓋駐樹杪鳳臺存融  
雪滋花色微風送鳥言夕陽未歸去垂釣待魚殫



葉生宅陪餞內兄

誰不惜車東聲華滿國中  
卷簾堂未暮吹竹盞能空  
池水澄寒碧窓花馥晚紅  
親交知我在為爾餞筵同

過別內兄

落日鳳城頭微風鼓角流  
御溝寒水咽清禁紫煙浮  
剖竹為名郡橫金作遠遊  
平生輕外慮不免別君愁

內兄過別雞鳴山房

積雪侵苔徑殘山抱竹扉  
蕭條官舍暮惆悵帝京違  
海

路愁俱往江城淚共揮雞鳴北湖上憑望去光輝

神樂觀諸公同坐餞別內兄

環山雄帝郭逝水鑿秦年歲歲甘泉上煌煌大道邊歌  
鍾流白日征旆卷寒煙何似為邦去傾城餞我賢

郊別內兄

青山看欲斷紫陌去向長日氣搖寒水風聲送晚涼金  
陵龍虎勢寶劍斗牛光獨有臨分袂僕夫亦感傷

贈別內兄伯雨

吾今年夏幸托雲巖先生門下秋來陪侍二三  
月耳而先生為松江之行何遽別也詩十一首  
多緣杯酒之間誠不能為別亦紀相從竊意先  
生不能別我亦是也嘉山水者不必廬處嗜  
珍旨者不必頓食人有未言而思千里相好心  
則然耳去方凜歲桂樹冬榮梅竹交輝江山滿  
目太白不云寸心貴不忘乎

朔風一何勁飄然江上吹江南一夜梅花發積雪朝看

亦滿墀雪色梅花兩相映都門無處無芳徑一尊攜酒  
遠來此望裏青山道傍水與君同生渤海域君家淄南  
我淄北少年弄筆競為文一日稱名俱可識遭時吾忝  
尚書郎已復君稱宰邑良功能不獨明廷最公等今扶  
漢道昌赫赫留朝六補闕從此官論青鎖月四海流傳  
賈誼書千秋如未歐陽沒而我迂愚世所嗔紛紛情態  
後來新不能東耕避賢者空復南冠學事人蓬鬢沙顏  
誰復憐遙山瘴水昨來旋東城並馬是何日南國啼鶯

二月天楊柳青青大江涘江流浩浩思歸子君行過闕  
覲衣裳吾繼還鄉問桑梓雲裏長松碧石枝朝來滿樹  
綠蘿絲絲蘿詎擬今如是天馬由來衆不知猶及觀濤  
八月回况復登高九日杯黃花入手便芳馥清江照人  
無塵埃儒宮舊在雞鳴麓諫垣能枉鹿頭轂無數名山  
許共行不時綠酒歡方逐謂來相逢得相守岐路驚人  
又分手客中孤遊空我情海上殊觀盡君有賓還宴罷  
東將去此際看君空百慮過鳥交啼把袂前歸雲故繞

翻旌處男兒所至要名成不須別淚紛紛傾煌煌為良  
二千石台鼎他年在此行

送蘇一峯侍郎獻績如京蘇舊銓司

日色覆平津年光催別晨江帆今送客水鏡舊為人城  
闕融殘雪山河入早春寄言花共柳好作道途新

送曹給事赴京

諫議官應重看君此一時書因規社上名始賦臺知過  
闕春將晚揚帆雨乍隨江流亦東去懷主共如斯

送孫京兆致仕歸慈谿

城郭頓生姿金陵坐鎮時致身時輩許乞疾主恩推人  
老攀江上山林卧海涯祇應五色詔名德復婁師

送倫彥式祭酒奉其太夫人歸養南海

君著老萊衣非歡畫錦歸師筵新禮樂帝幄舊恩暉路  
入黃花滿檣隨彩霧飛三年高義在復爾戀依依

送張子陽太常赴京

今皇經術理侍從復君才宇內名誰敵南中名獨回江

雲隨五色夜宿接三台應憶金陵別秋風鴻雁來

送費鍾石侍郎上績如京

遙將三歲績北闕上龍墀宰府古來貴斯文今在茲衣  
冠匡世俗勲德滿京師正值梅花發清芬薦別卮

送曹給事出守寧國

歲月金門路叨陪上履綦君多補衮意吾送剖符時南  
國股肱郡西川玉雪姿敬亭今勝絕應待有新詩

送曾給事赴京



金陵望京色只在五雲邊側席君王待南司諷議賢才  
兼堪世用書奏使人傳酒罷欲分手羨君行若仙

送聞石塘太宰赴京

山水浙東去聲華共若斯高賢希世出明主俾衡持風  
俗歸淳後春廷上績時人今公盡望留佐袞衣垂

送錢桐溪司徒赴京

不獨稱佳麗河山王氣存司徒分國計端笏儼都門宇  
內勲名滿江南制節繁誰能公可薦密勿切朝昏

楊給事尊堂受封

載筆聞曩至晨昏願豈違  
遭逢勸簪笏浩蕩借恩暉  
瑣闥人賢在金陵母德歸  
共言能主報直道似君稀

送歐石江少宰

為赴司衡名應聞開府  
賢歌聲方映日啟事藉山年  
才大今能用書成世已傳  
從茲雲路濶豪俊入翩翩

送陳介泉中丞赴河西

張掖國西門中丞山甫論  
從天下節鉞絕塞駐戎軒  
蠻

賦千邦入威名萬里存空傳漢出使此路去河源

送李泮涯尚書赴京

敕使召還都爭言新命殊三朝皆報主六典復司徒舊  
德今誰在皇心古帝俱最應邊餉賴西北壯規模

送徐楓岡中丞赴薊

中丞今塞上開府作藩維况復神州在應勞聖主知山  
河千古壯氣象八陵滋長策當何定威名仰昔時

送陳給事中赴湖廣叅議

秋高憑遠色為送武昌行畫省名原重叅藩位不輕江  
樓千里目湘竹四時情試發郢中倡應希和者聲

至後送馬西玄侍郎赴京

一從吹管動陽氣物應知河柳滋將遍江梅爛已施人  
才南就日吾道北歸時制作今皇志宗儒在禮司

送江京兆景熙赴京

赫赫都門坐鎮來三年為政不凡才能令江上風濤鬱  
復道人間夜戶開遶郭青山常帶雨經春芳樹早生梅

揚帆又送朝天去待報明廷寵壘回

送聞石塘尚書赴京

下榻長安彼一時復從南土奉光儀  
憐才近世難公似論德中朝亦我師  
山郭欲銷殘暑氣江帆只待好風吹  
惟應去後遙相望夜夜台階紫極垂

晨赴太學

楊柳青青古栢連一區為舍去人偏  
惟將閉戶供長日祇過園橋踏曉煙  
禁裏啼鶯春樹滿池邊滋草露華鮮

幽情自愛羣芳發物色風光共遠天

南都清明

羣山遶郭大江流復作金陵浩蕩遊帝里歌鍾行處是  
人家垂柳映門幽微風竹樹搖晴日薄暮樓船散水洲  
莫謂花開還落去曾相舞勸百盃休

春日同諸年友故漢王府宴集

故園亭榭鬱參差暇日親朋盡在茲早屬風光為地主  
兼多水竹弄幽姿侵堦藉草銜杯滿夾路垂楊去馬遲

勿謂樽空又分手他年相望足相思

春日飲顧東橋園時蔣子雲方伯同坐

棄官江上肯歸耕幾畝城中喜自營結宇故栽芳樹滿  
看山不斷白雲生身裁鶴氅稱居士家本龍門遠俗情  
為掃落花名蔣徑春來吾忝衆賓行

春日聞人邦正招至徐氏東園

戚里園亭傍水開主人延客夕陽催城邊踏草尋幽徑  
石上流泉浸碧苔幾畝但愁芳樹歇一春常聽好鶯來

頗聞絕勝蘭亭日亦忝茲遊與上才

楊叅仁甫招至東麓亭上

幽棲半嶺白雲生曲磴隨巖碧蔓縈閣上晴光連御柳  
城中流水帶山楹憑欄歷歷羣峯出種竹蕭蕭一院成  
不似邀歡為地主獨能選擇此來行

送秦鳳山尚書致仕歸無錫

如聞珍重疏閒情為遣安車遂晚榮海上青山歸舊隱  
籬邊黃菊待遙征衣冠願謝明時事功德長垂君子名



無限觀人多下淚追攀不復駐高旌

丙申至日太學齋居和費鍾石侍郎喜晴次韻

竟夕陰雲掩太清高齋寥廓對松聲長風忽送銀河出  
倒月能翻壁水晴夾路旌旗凌海日中宵星宿帶壇燈  
為歡天意成裡祀一曲真堪答聖明

內兄來自松江留宿雞鳴山舍

一別清揚那更攀相思只上對門山山中亂木愁仍劇  
海上歸雲夢幾還自爾驚人生白髮聊因為客慰離顏

一尊雖復同明月恐是來朝東出關

費鍾石侍郎宅宴集用聯句韻奉酬一首

敢擬文星聚此宵春來冠蓋忝相招不妨四坐隨佳會  
實托羣公在本朝華燭光中清漏滴玉簫聲外綵雲飄  
新詩字字歸能咏曾比鳴球盡可敲

送傅光祿朝晉赴京

都門清雅古來名復此微官托俊英南陌聯鑣常日得  
西郊別袂片時輕春帆處處江花落寒食朝朝山雨生

無限垂楊堪繫纜臨流且為一尊傾

送傅御史歸省

江漢滔滔制節繁榴花五月映歸軒  
身邊鳳字供親壽階下驄鞍荷主恩  
杖屨舊稱君子德詩書今並母儀論  
東南若到稱觴日定有葱煙上里門

送錢給事出守袁州錢舊南昌推官

載筆洪州日月遷至今歌頌四明賢  
乙明自悔春田訟伯起如多夜餽還  
鎖闥移官仍楚俗褰帷行縣亦章邊

道途若問新為守應有人傳佐郡年

題陳司封榮壽瞻思卷

浙水吳山產獨奇為郎宰府衆人推  
皇恩并錄三遷日愛子忻承七袞時  
閣上龍章多氣色尊前象服有威儀  
還聞常為稱觴罷永痛遊仙更一悲

吳郎中母輓詩

獨乘鶴駕去安之儷美高堂彼一時  
總角圖詩多自授薦筵蘋藻尚人知  
河山百里天書映邑井千年母德垂

惟有沾襟身貴後大夫無日不親思

送陳給事赴京陳紹興人

明時臺諫道俱申瑣闥留朝諷議臣補袞宣年多志意  
探書禹穴舊經綸江城日出青山合海路雲生采鷁新  
共送晨風來祖席依依應戀玉為人

雞鳴山望玄武湖

金陵天下險茲山在北門憑高覽八極夕陽滿平原雜  
花落巖樹大江正東奔餘流注為澤春水何其繁洲島

列相望鳧鷖鳴相喧波光靜可鑒照影羣山翻千年寄  
歌舞百里滋蘭蓀時時出雲霧長添王氣存

無題

茵席溝渠各所宜巧耶有道得如斯平生正不人憐受  
豈有烏頭變白時

愚谷集卷二

欽定四庫全書

愚谷集卷三

明 李舜臣 撰

江西稿

江西送陸叅赴陝西右使陸舊講官

江頭頻送客此日復君行望裏青山合尊前采鷁明秦  
川遙問俗宣室舊知名聞有甘泉賦雄情待是成

夢

萬里臨淄路頃緣夢裏看村居還昨似樹色正冬殘道  
舊過親友憐余勉飯餐忽然疎竹雨催覺曙衾寒

貢院桂花

秋風凋衆葉桂樹晚應開幾日空深院清香伴碧苔拂  
衣人共覺移席雁初回念獨能為客看花是再來

元日雪集和張憲使子魚

客偶高堂集春初上國還一尊仍對雪衆喜或豐年落  
處花枝重融時草色鮮最難君是唱終和未能妍



十四夜藩省宴集

徽垣看月上茲夕已嬋媛樓度庭初滿燈張市漸誼寒  
花滋露發火樹映星翻幾似今為樂笙歌倒一尊

十五夜都司宴集

月迴光無缺星寒爛已施百枝張幕色萬舞任渠為激  
壯軍中曲縱橫坐上卮高朋復佳節聊得此追隨

十六夜滕王閣宴集

憐此光猶滿迎燠閣已開江搖銀漢動山度紫煙來萬

火紛南陌層樓逼上台憑欄無限好應約早春杯

飲趙僉子玉別署

緣陪衆君子飛蓋偶能來暝色稀人吏高堂命酒盃  
月明花露泣秋晚竹風迴無限相逢意羈愁為一開

近郊宴集值雨

出谷旌旗轉綠江鼓吹來異方多勝覽春色復相催  
野曠風生竹山青雨映梅惜無今夜月留酌踏煙回

湖上

望極東湖水春來益可憐  
長隄回草色斜日澹波煙  
窈窕雙下逶迤渚自連  
何當呼小艇相與出潺湲

卧起

簿書時復暇聊得掩晴閨  
卧覺衾猶薄行來鳥正啼  
藥畦深石畔花徑遠亭西  
在遠心常愜春兼事事齊

送陸副使罷歸吳江

吳下能文者明時復陸機  
偶逢章水上已拂早春衣  
啼鳥晴相和歸雲晚競飛  
傾都人正惜君去掩山扉

將按饒州

正好秋蓬似因風轉未休世途輕宦拙兒女別家愁庭  
次梅初吐江南橘再收薰葭何處夜今去泊孤舟

風阻涉湖復指進賢

始擬殘年棹如聞震澤平輕帆虛水色攬轡復山行出  
郭風扶轂穿林霧濯纓不辭遙役去霖潦此縱橫

進賢曉發

道路北風發飄飄吹我行他鄉換雙鬢殘歲轉孤旌夜

雨草根活晨暉山色明經過從候吏雜樹識方名

閱武

晨煙萬突雜郊氛遙逐肩輿閱一軍雲薄寒城旌外湧  
江鳴遠樹坐中間人多猿臂堪擒敵馬或龍媒乍不羣  
歸路徐看衰柳色似綠鉦鼓片時欣

庭中植有紅梅偶過李叅兼有紅白二種因簡

南州十月桂枝榮小院梅開近亦明色借紫雲凌霧薄  
香滋玉露入宵盈客懷聊得尊中遣詩句應能樹畔成

天府兼如瑤萼發從君臨賞倍含情

憲使張子魚餽魚

入門雙鯉濯蒼鱗知是君分與故人釣得云逢緘素遣  
將來應比錯刀新初晴雪色融斜日半吐花芳報早春  
安得煙波還此去正憐杯水歎吾頻

早春貢院宴集弋陽王遣伎咸至

江城鬱鬱朝常雨溪館泠泠霧始開地僻經冬封綠蘚  
春來隨處接金杯鶯聲管吹如相妒竹色波光倏盡回

紛屢中庭方萬舞兼能分賞片時來

亭上

高亭獨坐怯餘寒漸已晴暉轉畫闌楊柳總歸湖外色  
梅花宛似雪中看疏池種竹隨春事散帙揮毫亦暫歡  
回首故人微祿在惟應拙薄自江干

同諸公貢院小集

最宜南陌靜緇塵况復高城過雨新夾路啼鶯歌似響  
一春踏草到應頻侵苔薜荔縈初蔓隔水衣裳掛滿筠

無限夕陽堪共醉明朝世務恐牽人

雨

南中一雨動成霖湖上春雲幾日陰似妬花開能爛漫  
全滋竹色使蕭森塔寒水濯繁苔出地僻煙封省樹深  
異域應常憐病骨茲晨聊得散幽襟

東軒對雨

長風吹雨過東園炎德驅無五月繁坐對遙山煙乍合  
正憐高鳥濕能翻微官垂白空雙鬢久客耽幽稍一軒



欄藥盆花看益好已多停水蕙蘭根

貢院池上

江城此地獨知名試共尋幽處處行  
選得松根千樹合移來水面各言清  
娟娟隔徑明丹實裊裊當波出翠莖  
未便觀魚好垂釣從渠窺客去來輕

宴都司樟樹下

幕府樟陰幾畝垂將軍綺席肯階移  
分明翠濕添盃酌竟夕清吟雜管吹  
烏鵲堪輕三伏雨青霄不礙萬年枝

還須滿月情何似縱卜今宵露那知

陪在滕王閣餞客

共追使節到潺湲為復登樓在別筵近檻不勝游子意  
當杯祇覺衆人賢秋風磬折終誰是竟日笙歌亦自妍  
正憶陶潛初便去那曾束帶小兒前

酬李伯華寄書

忽驚平楚萬山秋稍喜行臺此地優白石青松逢處是  
危亭曲閣坐來幽一春種藥供多病方寸忘機減獨愁

能枉遙書霄漢上相從同作豫章遊

乙未中秋

一從繫纜邁流光再見高樓滿月涼  
總為嬋媛偏此夕不知留滯尚他鄉  
團團草露清難似細細蘿煙裊乍長  
行色欲依河漢曲待看瑤采度微茫

送陳都御史致仕陳蘇州人贛州巡撫

記曾顏色望青霄此地逢迎斧鉞飄  
下邑祇傳安石在南中空惜去旌搖  
雲連浦樹明秋野水浸江沙落早潮

他日虎丘問耆舊清時龍德獨逍遙

求賢詔許尚巖阿今復東還且奈何終屬陶潛三徑有  
真嫌劉寵一錢多江間綠水明心曲海上青山著鬢皤  
處處秋蘭猶自好扁舟采攬足經過

幾人勲德在明時南紀公來偶視師誰使中軍生氣色  
獨籌前箸卧旌麾岷山有淚堪常墮章水無情任所之  
遼海只今憂未淺不當還出佐支離

病懷

吾生蹇拙合微名無奈侵尋病所嬰南國炎蒸今再過  
中秋醫藥尚無情苔殘白石庭陰合木落蒼堦露氣清  
門外江澄聞練似猶多虛負片帆輕

瑞州寄別陸使遷廣東左使

西來每憶城隅別左省初聞嶺外真倚望長天遙賜璽  
叨陪往日得驅輪春風祖席羣公出江閣樓船幾鷓新  
昏見漸南星獨迴暉暉應為紫垣人

五老峯

羣仙赤霞珮謁帝青霄通條過崑崙顛八荒逝安窮廬  
山偶回首滄海蓬萊宮須臾酌彭蠡還駕來時鴻高高  
去無極遺跡茲龍從遂為萬仞石削壁凌蒼穹盤迴萬  
巖壑湖上峯獨雄朝雲變紫翠旦夕飛輕虹寒暑豈不  
化芝草四時紅昨出江州道天地覽斯崇彷彿見揖手  
招客令予東感此結深意夜寢煙山空忽若乘風下怡  
然數老翁把臂一共笑千年始相逢夢中憶所授病後  
扶衰躬復從碧澗側倚望瑤華叢極願捐微祿致身與

之同

吉安謁文山公祠公孫生員熙出公遺翰因示

宋道昔云季戎馬推中州獨公歷萬死感慨當時謀廬  
陵在南域冠蓋元名隩差我瑞華出浩蕩螺川流富田  
餘揖讓夙昔公園丘荒山闕祠舍生氣誰為收飛橋駕  
長虹松篁羅道周涼飈却炎暑好鳥鳴未休哲孫出遺  
翰忽若蒼龍游魯公稱妙絕惟此真其儔護持屬山靈

棟宇終天留

謁文山公祠道中作

在遠日多思，欽賢夜忘寐。  
緣與簿書辭，况復郊原遂。  
野曠宜風生，山深似雲戲。  
臨流纓欲濯，出谷衣全翠。  
顧茲難久留，拘迫慚為吏。

將按九江泊石頭口

江閣遠猶雄，江流澹若空。  
晴沙行白鳥，缺岸出青楓。  
野泛清秋色，山迴落日風。  
真同漁父宿，亦在釣磯東。

桃花山



巖隨茅屋過荆扉  
水落溪田刈稻稀  
赤坂度山泥滑滑  
青松出谷霧霏霏  
寒帷北下聊吾事  
逐祿南中亦昨非  
稍喜雲開還在眼  
香爐石耳自晴暉

德安道中

蔓草垂藤引使車  
石田流水帶人居  
清秋不落丹巖樹  
薄午方緣白石渠  
谷口魚梁旆旆轉  
山中蘿徑牧樵餘  
為應問俗遲遲去  
纔可塵煩漸漸疎

圓通寺

百里廬山勝獨尋  
山山林壑帶秋陰  
微風夾路參差見  
竟日娛人紫翠森  
稍訝飛軒行樹杪  
忽看削壁入雲深  
幽居謝爾為僧在  
清磬時時物外心

吾未識李空同先生  
每讀先生詩且官渠後  
欽其為人過圓通寺懸多詩刻而僧獨取先生者有  
靜言看石耳之句石耳峯名廬山佳處

先生是在武皇年  
彩筆滄江動遠天  
僧徒亦識山中字  
學士今傳鄴下篇  
當日鳴泉邀節鉞  
清秋高閣自雲煙

誰令流落明時去石耳空知炫獨妍

宿東林寺

谷轉還青嶠煙扶下赤坡秋山凋葉少暝徑咽泉多舊  
迹餘溪沼深齋到薜蘿更邀明月上徙倚辨嵯峩

山寺忽雲端山行處處歡晚涼巖際宿秋色月中看緩  
步多幽壑清聲即近灘蒼堦疑露濕瀑水墮空寒

發東林

東林千載後尚種芙蓉池出門見初日夾路雲煙隨深

谷忽無極灑嶠泉奔馳潺潺碧澗吞裊裊垂猿枝微風  
動幽響萬壑清秋時長林鬱光景竹樹何參差蒼茫虎  
溪路故蹊不可窺前山復迴合度嶺揚旌麾恍若乘風  
翔果與丹霄期雜花半巖上草露團葳蕤雄蟠三百里  
竒峯方在茲崢嶸乍可望浩蕩今晨思登遊能累宿肯  
負幽人姿

九月八日始聞雁聲

東山常八月夜夜雁歸聲何至江州聽方多菊露清倚

簷長送爾遠道總關情不問都門過知無繫帛輕

九江分司對雨

偶出廬山下輕雲隨蓋飛度河為暝色灑雨滿秋扉細  
細從東至森森洗竹暉捲簾入蒼霧還寢更絺衣漸夕  
堦生溜羣峯勢乍稀江流何震蕩鴻雁亦來歸是月黃  
花節清宵玉露揮高城恐寂寞滋菊使芳菲

九日

佳晨爛漫隔籬枝水國煙霜落木時百里廬山堪勝絕

三秋鴻雁獨歸遲  
肩輿尚爾行花縣  
戲馬應渠載酒卮  
止飲經年還肺病  
蕭條一任北風吹

九江分司九日劉副使見過

遙水樓船擁節旄  
明公斧鉞靜江臯  
為逢雁度俱今日  
肯假霜威過濁醪  
手裏黃花清露滿  
城隅白浪暮天高  
出門歷歷明星在  
指點秋河到玉鑱

九江李主事招至洗心亭上時同劉副使在坐

江流霧斂自晴川  
江閣秋深况綺筵  
幔卷微風添坐色

堦含濺水倍花鮮當歌浪鼓蛟鼉夕隔岸山搖竹樹煙  
李白劉楨應逸興時時能此共潺湲

將發九江

啼雞催曉發度雁脩秋深自是羈懷甚兼多草際吟風  
清山易冷月落閣還陰木葉兼江浪方添隱几心

登天池

東林徑轉過村翁為指天池此路通側蹬迴峯傾午日  
危亭俯澗落秋風直緣薜荔千巖上稍出旌旗萬木中

金天口居人言  
卷三  
倏忽白雲山谷滿只疑蓬島坐溟空

宿開先寺

山行累日度車遲正爾耽山處處竒近寺看峯還劍似  
窮幽積水到龍池泉飛直下三千丈月出裁虧二八時  
隱隱牛間應紫氣書臺高卧露天滋

開先寺別何邦鎮

昔人讀書處瀑水香爐峯年往碑仍在雲深嶂若重長  
風吹落日林壑上秋容何意都門舊今遙此地逢



佛手巖巖近顛仙碑亭

山中雲共宿秋晚菊爭開  
突兀懸巖出蒼茫拂霧來  
碑亭看再過峯勢抱千迴  
誰結茅簷下能堪碧澗哀

讀書臺在雙劍峯下南唐李煜讀書處也

後主嘗是遊幽巖既為寺  
書臺俯石門綵閣兼山賜  
雙劍削天端千秋猶霸意  
蒼茫谷口來徙倚江南思

觀瀾閣

天地見彭蠡清淺雜煙浮  
忽訝城隅望蒼茫海上秋  
長

風驅遠水落日走神蚪駭浪時能似銀山碎十洲



愚谷集卷三

欽定四庫全書

集部

愚谷集卷五

四

詳校官給事中臣王鍾健

中書<sub>臣</sub>劉源溥覆勘

總校官進士臣繆琪

校對官中書臣王璜

謄錄監生臣王天祿

欽定四庫全書

愚谷集卷四

歸田稿

秋日郊行

步出無晨暮薄田隨所經雖非達者致元是野人形晴  
雨滋寒水涼颺起夕坳何知謝金紫歸意反吾寧

飲酒

明

李舜臣

撰

終朝靜無事頗賴酒尊濃  
醉裏愁能薄歸來興不空  
深杯從婦勸頻顧覺兒聰  
怪底陶彭澤田多種秫功  
貧家何所有濁酒在牀頭  
手輒禁寒漉身應為晚謀  
村中單騎入燈下數行休  
賴得醺然卧區區誰復求

秋夕友人過飲

墀菊開應晚園蔬摘欲霜  
一樽來共酌數本坐猶芳  
柴館始晴雨荒筵及月涼  
愧非賢者室帶有德星光

秋日諸友招飲病體未赴

一自得歸心追遊每共尋  
銜杯能月上開菊況秋深  
露白庭陰淨山青海氣沉  
應多新熟酒擬作向來斟

始擬戶常關歸身反未閑  
一秋農自去竟日鳥俱還  
落樹出平野澄潭入晚山  
登高雖此月知濯畝中顏

不復身豪健千杯似往年  
春來能斷酒歲晚未歸田  
客為黃花命歌應白雪妍  
相從欲何限今負主人賢

余家南望是十里到城餘  
地僻惟聞雁村貧亦有蔬  
舊開三徑在新結數楹居  
早晚攀同駕來看隱者廬

自漢推經術吾鄉未乏儒俱操金石奏誰止玉堂趨帶  
水滋星氣高城表海隅病夫何所望公等日亨衢

壬寅九月十有七日吾生四十有四年矣

叨官敢自意亦昨賦歸歟家薄徒書滿園荒始草除眼  
看鴻雁去心覺蕙蘭疎益忝衰容鬢年垂五九餘

冬日招友人飲二首

讀書非避世種竹稍成家幾為辭城市因之卧海涯小  
堂春覆草曲檻晚留花及此高軒過郊原欲雪加

村醪秋自釀園果歲能收不有親交共誰堪寥廓愁花  
中惟愛菊溜上不驚鷗旦日城南路無嫌我薄留

甲辰初度

年年今日酒多為菊花斟歌管誰能那芳菲乍可臨罷  
場園賦入閉戶草蟲吟敢向誇朋輩悠然歲暮心

初度友人過飲

乍喜高軒過還驚短髮催相看俱老大相慰有歸來濁  
酒家能釀黃花手所栽今宵踏明月莫惜醉中回



于時仲春作仲春詩

維時春欲半映日色皆分草意侵堦出新聲到處聞  
林  
開花照樹冰泮水生紋更有銜泥燕飛來意似欣

首夏園中

獨坐東園裏仍耽首夏時乍將書自曝微悅鳥還窺  
爛  
漫仙人實芳菲大谷枝願希高尚者從此學棲遲

園中

起卧祇茅屋行吟自野夫山林非遁世水竹乃忘吾  
鶯

語春將晚葵傾日向晡憐茲雖負郭似覺遠人徒

庭中

昨夜雨新晴今朝花更明下堦看鹿迹倚樹辨禽聲袖  
為移蘭濕襟緣愛竹清荒居春較可况復托歸情

飲李氏村同程伯書使君乘月踏雪聯輿而還

路出金波外車驅素雪間清光兩相映乘興偶俱還野  
入銀為塢星涵玉作山褰帷三十里獨喜淨塵顏

過友人郊園

暇日薄言出郊園到薜蘿為將芳樹歇亦是別君多即  
檻看紅藥開尊面綠荷晚來煙徑上率爾遂長歌

別館成招友人飲

一自春風二月初柴扉竹徑作間居城中好似山人宅  
門外應多長者車

阻雨新店有懷仁夫

宿雨淹歸騎終朝在遠岑閣中山木落門外海雲深無  
復為吾適况當懷所欽應憐洋水上何處托孤吟

小堂寒江獨釣圖未徹宜此春雪

小堂不及掃尚掛寒江圖怪底春來雪飄然二月俱

酬何廣文惠鵝

科頭晨未梳報有山陰使不及書黃庭叨承余自愧

雨夜

雨氣侵簾入風聲托樹長片雲能掩月星宿此俱藏

雜著

至家

萬里羈危日孤兒慟絕時艱難歸敝屋寂寞向空帷  
耿耿中宵立漣漣盡日悲不能成一寐托夢接光儀

謁先墓歸途作

潛寐忽已久神遊竟不還目存猶髣髴血繼更潺湲  
雨後花饒笑春深鳥自閑嗟吾亦多罪天也獨投艱

丙戌初度

九月十七日屆吾初度緬憶辛巳年吾有東南  
之行是日也蓋在揚州明年壬午從先子奔喪

歸是日在宿遷縣又明年癸未吾舉進士得奉  
朝趨三年皆在京不知今日乃在廬次

薦裕時方燠羣芳忽已闕噉噉南翔雁猶解違霜雪人  
生誠未易無徵傷吾劣淮海魂昔驚京華心每折尤憐

今日淚沾灑盡成血

陳思悼幼女辭  
吾五福無徵

秋懷時吾生已二十九年

耿耿憂難歇秋風彌自憐雲深疲去雁露冷咽鳴蟬薄  
命貧仍病疎心悔更愆無聞聖所戒而我已茲年

戊子中秋見月痛憶往昔摧肝剖髓情見乎辭

明月皎三五况復中秋時清暉豈不滿望望祇益悲憶  
昔忝朝趨親承白髮娛休澣時乘暇歡宴日相煦歸散  
紫宸朝鳴玉步道遙譬烏本戀私何言寄迢迢佳節一  
以臨忻承旅寓心稱觴拜且舞起坐彈鳴琴及釜方在此  
樽罍復能綺圓方且珍羞水陸克遐邇嗟吾薄枯躬  
五福本無同惠時良不偶孔燕誰能終異物感弱孫沉  
痛為銷魂大運一陵替萬事茲掌翻嗟吾天所伐吾罪

甘隕越白髮遂見奪含貝一何忽孤兒號欲絕五內崩  
以裂從此飾歸轡血繼聲幽咽間闕指敝屋二九達東  
服生行見櫬還惻惻動邦族孤兒苦欲死嘔血將難已  
恭承哲人意黽勉茲伊始墓門何蕭蕭剖髓訣今朝歸  
體托窮泉慟絕不可招自昔入承明庶幾振金聲方烏  
終越吟擬翰祇尊情投簪三上書微尚不自如巖巖東  
曹間維繫心何踈頗聞古人志微祿忻從事寧知為所  
嬰歲暮及顛躓顛躓茲云極白日忽西匿獨覽泣吾非



酷痛推中臆倚廬日月遷寥廓奉几筵薦禫時方煥忽  
忽吟寒蟬躑躅下中堂椎心訴穹蒼白露沾我衣驚風  
飄我裳衰草咽秋蟲清野號孤鴻俯仰竊自憐積恨安  
所終

除夕

悲今情已摧懷往中彌逆憂來信無方悽然忽不懌擬  
粲七哀兼方銜四愁劇攢念猶在茲何以言除夕

元旦作

大運握冥機，蒼精散初澤。三統開元祚，羣化舒柔脈。皇  
聖昭神功，下國同光飾。猶自空堂上，抱影悲今昔。束帶  
愆既多，反服瑕彌積。行年忽在茲，瓠落空吾迹。棲之鷦  
鷯枝，奮非霄漢翮。茫茫途已窮，永歎將安適。

禫後

禫服憐殘息，閑園學種蔬。饑餐惟赤米，緩步有清渠。谷  
口稀人訪，蘿軒澹自居。方知棲遁者，不惜謝公車。

將發鄉園效唐初體

鷺行趨命日蟬翼聳身時樹落千山色風生萬壑悲含  
情辭故里揮涕戀先祠莫使東園穢歸歟已有期  
佳氣指神京邦人餞有行詔從天漢落淚逐露秋傾去  
去傷蓬轉啣感鹿鳴甘泉曾擬賦獻罷即歸耕

海豐道中

海氣鬱蒼蒼山河失故疆重來村落改遙望荻蘆黃行  
李隨秋色衣冠赴帝鄉謬同趨召者慙負意何長

晚投鹽山縣

行路一何難  
迎暉尚據鞍  
林應千鳥宿  
天已萬星寒  
月出明前渚  
風聲雜近灘  
荒城知未遠  
隱隱氣中看

馬坡村贈舊館人

數載今重到  
還非駟馬來  
主人年鬢改  
遊子客程催  
雞黍歡清夜  
堦除落故槐  
明秋隨朔雁  
遲我復能回

宿霸州館

寥廓此中宿  
遙聽易水聲  
鑿帷幾月入  
疎館北風鳴  
夜覺秋初永  
寒知霜正清  
不堪情已倦  
明日尚遄征

愚谷集卷四